

Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 12, 22. december 2014-imeersoq Atuussimasoq (Historisk)

Piniarnek aallaaniarnerlu pillugit Inatsisartut inatsisaat nr. 12-imi, 29. oktober 1999-imeersumi § 2, imm. 4, § 8, §§ 12-13, § 15 aamma §§ 17 aamma 18 naapertorlugit Inatsisartut inatsisaatigut nr. 1, 16. maj 2008-meersukkut kingullermik allangortinneqartumi aalajangersarneqarpoq:

Kapitali 1

Atuuffia

§ 1. Nalunaarummi matumani "arferit angisuut" tassaapput tikaagullit (Balaenoptera acutorostrata), tikaagulliusaat (Balaenoptera physalus), arfiviit (Balaena mysticetus), qipoqqaat (Megaptera novaeangliae) arferillu soqqallit allat tikaagullinnit kigutilissuarnillu (Physeter macrocephalus) anginerusut.

Kapitali 2

Eqqissimatitsineq

§ 2. Arferit angisuut Kalaallit Nunaata aalisarnikkut oqartussaaffigisaata iluani eqqissimatitaapput.

Imm. 2. Imm. 1-imi eqqissimatitsinermi tikaagullit, tikaagulliusaat, arfiviit aamma qipoqqaat ilaatinneqanngillat.

Kapitali 3

Piniagassanut pisassiissutinik aalajangersaaneq,

§ 3. Ukiumoortumik arfernik angisuunik pisassiissutinik aalajangersaaneq makkua eqqarsaatigalugit pissaaq:

1) Nunani tamalaani isumaqatigiissutit atsiorneqarsimasut pisuussutit piujuartinnissaat amerliartornissaallu siunertaralugu,

- 2) uumassusilerinikkut siunnersuineq,
- 3) atuisut ilisimasaat aamma,
- 4) Piniarneq pillugu Siunnersuisoqatigiinnut tusarniaaneq.

Imm. 2. Pisassiissutininik taakkunungalu piunasaqaatinik aalajangersaaneq pillugu nalunaaruteqarneq tamanut saqqummiunneqartarput www.naalakkersuisut.gl-imi aamma tusagassiorfinnut nalunaarutigalugu.

Kapitali 4

Piniarsinnaanermut akuersissutit, akuersissuteqarnerit aamma nakkutilliineq Piniarsinnaanermut akuersissutininik allagartanillu agguaassisarneq

§ 4. Kommunalbestyrelsi Naalakkersuisut pisassatut aalajangersimasaasa iluanni nalinginnaasumik akuersissuteqassaaq, piginnittumut angallat aqqatigut taasaq erseqqinnerusumilluunniit suussusiligaaq atorlugu, § 14 naapertorlugu tikaagulliusaanik pisaqarsinnaanermut.

Imm. 2. Kommunalbestyrelsi Naalakkersuisunit pisassiissutitut aalajangiussat iluini piniarsinnaanermut akuersissummik normulersukkanik tunniussisarpoq, tassuuna piginnittoq piniarsinnaanermut normunut tamanut angallammik aqqatigut taasaq erseqqinnerusumilluunniit suussusiligaaq atorlugu § 10 naapertorlugu tikaagullimmik ataatsimik, § 17 naapertorlugu arfivimmik ataatsimik aamma § 20 naapertorlugu qipoqqarmik ataatsimik pisaqarsinnaasunngorlugu.

Imm. 3. Tikaagullimmik, arfivimmik aamma qipoqqarmik piniarnissamut akuersissutit tunniunneqartarput kommunalbestyrelsimut qinnuteqartoqareernerata kingorna nunaqarfinni siulersuisut aamma najukkami aalisartunut piniartunullu peqatigiiffik tusarniaavigereerlugit. Piniarsinnaanermut akuersissutit agguaanneqassapput allattuiffissat normulersukkat Piniarnermut Naalakkersuisoqarfiup kommunalbestyrelsimut nassiussugai atorlugit.

Imm. 4. Kommunimi akuersissutit allagartallu agguaanneqartut qinnuteqaatinik tiguneqarsimasunit ikinnerussagaluarpata arfernik angisuunik piniarnissamut agguaassisoqassaaq tullerriiarilluni, ukiumi siuliani pisaqarsimasut kiisalu piniarsinnaanermut akuersissutit atorineqanngitsut eqqarsaatigalugit.

§ 5. Arfeqatigiinnut sisamaasunut tamanut tamakkiisumik pisassiissutit piffissap piniarfiusussap aallartinnginnerani ataatsikkoortumik agguaanneqartarput.

Imm. 2. Kommunalbestyrelsi tikaagulliusaarniarnissamut akuersissuteqarsinnaavoq inunnut, atuuttumik inuussutissarsiutigalugu piniarnermut allagartalinnut, aamma akuerisaasumik qaartartortalinnik tuukkartalimmik qamutililimmik angallatilimmut. Angallammik piginnittoq nammineq imaluunniit angallammi inuttaq arfernut qaartartortalimmik tuukkartalimmik atuisinnaanermut pikkorissarsimanermut atuuttumik uppersaateqassaaq. Akuersissutit tassaavoq allagaq kommunalbestyrelsip qinnuteqartumut tikaagulliusaarniarnissamut piunasaqaatinik naammassinissimasumut tunniussaa.

Imm. 3. Kommunalbestyrelsi arfivinniarnissamut aamma qipoqqarniarnissamut akuersissuteqarsinnaavoq inunnut atuuttumik inuussutissarsiutigalugu piniarnermut allagartalinnut, akuerisaasumik qaartartortalinnik tuukkartalimmik qamutililimmik angallatilinnut, piginnittoq

nammineerluni imaluunniit inuttaasoq arfanniarnermut qaartartumik tuukkartalimmik qamutilimmut atuinissamut pikkorissarnermut peqataasimanermut atuuttumik uppersaateqassaaq.

Imm. 4. Kommunalbestyrelsi tikaagullinniarnissamut akuersissuteqarsinnaavoq inunntu atuuttumik inuussutissarsiutigalugu piniarnermut allagartalinntu, aammaluunniit:

1) akuerisaasumik qaartartortalimmik tuukkartalimmik qamutililimmik angallatilinnut, aammalu piginnittoq nammineerluni imaluunniit inuttaasoq arfanniarnermut qaartartumik tuukkartalimmik qamutilimmut atuinissamut pikkorissartitsinermut peqataasimanermut atuuttumik uppersaateqassaaq, imaluunniit

2) § 12 naapertorlugu ataatsimoorluni piniarnissamut immikkut akuersissuteqartumut.

Imm. 5. Kinaluunniit angallammut tuukkartalimmik qamutililimmut imaluunniit ataatsimoorluni piniarnissamut ataatsikkut akuersissummik tunineqarsinnaanngilaq.

Imm. 6. Ataatsimoorluni piniartoqassatillugu piniarnermut naalakkatut toqqarneqartumut akuersissuteqartoqassaaq. Ataatsimoorluni piniarnermut peqataasussat allat aqqi piniarsinnaanermut akuersissutip tunuani allanneqassapput.

Imm. 7. Piniarsinnaanermut akuersissutip akuersissuteqarnerillu qaammatisiutit ukiuat malillugu ukiumut ataatsimut atuupput, taamaattorli takuuk § 7, imm. 4.

§ 6. Kommunalbestyrelsi tikaagullinniarnissami, arfivinniarnissami aamma qipoqqarniarnissami pisassiissutinut naapertuuttunik piniarsinnaanermut akuersissuteqareeripat kommunalbestyrelsip Piniarnermut Naalackersuisoqarfimmut nassiutissavai akuersissuteqarfigineqartut aqqi, inuttut normui, akuersissutip normui aamma GR-normut pillugit paasissutissat kingusinnerpaamik kommunip akuersissutinut immersuiffik Naalackersuisoqarfimmiit tigusaqarnerata kingornatigut qaammat ataaseq qaangiutsinnagu.

Imm. 2. Tikaagullimmik, arfivimmik aamma qipoqqarmik piniarsinnaanermut akuersissut Kalaallit Nunaata Kitaani aamma Tunumi tikaagullimmut atorneqariissaaq arfeq pisarineqarpat pissanneqarpalluunniit.

Imm. 3. Akuersissut ukiakkut pisassiissutinik sinneruttunik agguasseqqittoqartinnagu atorneqarsimanngitsoq pisassiissutinut agguateqqitassanut ingerlaannartumik ilanngunneqassaaq, tamatumalu kingornatigut akuersissummik piginnittuusimasumit atorneqarsinnaassanani.

Imm. 4. Piniarnermut Naalackersuisup ukiumi tulliuuttumi kommunimi pisassiissutip ikilisinnavaai paasineqassagalarpat kommunimi:

1) tikaagulliusaartoqarsimasoq pissaasoqarsimallunuunniit akuersissuteqartoqarani,

2) akuersissuteqarani tikaagullittoqarsimappat, arfivittoqarsimappat qipoqqartoqarsimappalluunniit pissaasoqarsimallunuunniit imaluunniit

3) qaammatisiutit ukiuat malillugit ukiumut akuersissutigineqartunit amerlanerusunik tikaagullittoqarsimappat, tikaagulliusaartoqarsimappat, arfivittoqarsimappat imaluunniit qipoqqartoqarsimappat pissaasoqarsimallunuunniit. Pisassiissutip ikilineqarsinnaapput tikaagullinnut, tikaagulliusaanut, arfivinnut qipoqqarnulluunniit apeqqutaatinnagu sorlernut unioqquitsisoqarsimansoq.

Imm. 5. Arfernik eqqissimatitaasunik pisaqarneq pissannerluunniit ukiumi pineqartumi ukiumiluunniit tulliuuttumi kommunimi inatsisinik unioqquitsiviusumi pisassiissutip ikilisinneqarnerannik kinguneqarsinnaavoq. Tikaagullinnut, tikaagulliusaanut, arfivinnut

qipoqqarnulluuniit pisassiissutinik ikilisitsisoqarsinnaavoq.

Piniarsinnaanermut akuersissutinik agguaasseqqinneq

§ 7. Piniarnermut Naalackersuisoq najukkami aalisartut piniartullu peqatigiiffiat tusarniaavigereerlugu aalajangiisinnaavoq piniarsinnaanermut akuersissut tunniunneqarsimasoq imaluunniit akuersissutit tunniunneqarsimasut kommunip iluani nuunneqassasut imaluunniit atorunnaassasut tamanna pillugu tamanut saqqummiussilluni www.naalackersuisut.gl atorlugu tusagassiorfinnullu nalunaaruteqartoqarsimappat <http://www.naalackersuisut.gl/>

Imm. 2. Nalunaaruteqartoqareerpat piniarsinnaanermut akuersissummik piginnittup imaluunniit akuersissutinik piginnittut piniarsinnaanermut akuersissut imaluunniit akuersissutit kommunalbestyrelsimut tunniutissavaat.

Imm. 3. Piniarnermut Naalackersuisup kommunalbestyrelsi piumaffigisinnaavaa imm. 1 naapertorlugu piniarsinnaanermut akuersissutit tunniunneqareersimasut atorunnaarseqqullugit, tassa akuersissuteqartumit akuersissuteqartunilluunniit piffissaq eqqorlugu arfernik pisanik pissatanillu nalunaarutiginnittarneq pillugu nalunaarummi maleruagassat malillugit arferit pisat pissatallu pillugit Piniarnermut Naalackersuisumut nalunaaruteqarsimanngippata.

Imm. 4. Piniarnermut Naalackersuisoq Kalaallit Nunaanni Aalisartut Piniartullu Kattuffiat (KNAPK) aamma Kommunit Kattuffiat (KANUKOKA) siumut tusarniaaereluni www.naalackersuisut.gl aamma tusagassiorfitsigut nalunaaruteqarnikkut, akuersissutit atortussanngortinneqarsimasut kommunep iluani, kommunimut allamut nuunneqartut imaluunniit atorunnaarsinneqartut piffissaq nalunaaruteqarfiusoq aallartiffigalugu. Tamatuma kingorna akuersissutit utertinneqassapput, takuuk imm. 2.

Pisassiissutinik agguaasseqqinneq

§ 8. Piniarnermut Naalackersuisup KNAPK aamma KANUKOKA tusarniaavigereerlugit tikaagullinnut, tikaagulliusaanut, arfivinnut aamma qipoqqarnut pisassiissutit sinnerisinnaasaat agguaateqqissavai. Ukiuni qaammatsiuteqarfiusuni tamani kingusinnerpaamik 1. september tikaagullittassanik, tikaagulliusaartassanik, arfivittassanik aamma qipoqqartassanik agguaasseqqinnissaq aallartinneqarsimassaaq. Arfanniarneq inerteqqutaavoq agguaasseqqinnissaq ullormik ataatsimik sioqqullugu aatsaallu aallarteqqinneqarsinnaalluni kommuni najukkami aalisartut piniartullu peqatigiiffiat tusarniaavigereerlugu nutaamik agguaasseqqereerpat tamanullu nalunaaruteqareerpat.

Imm. 2. <http://www.naalackersuisut.gl/> Agguaasseqqinneq tamatumunngalu piumasaqaatit pillugit nalunaaruteqarneq tamanut saqqummiunneqassaaq www.naalackersuisut.gl aqutigalugu tusagassiorfinnullu nalunaaruteqarnikkut.

Imm. 3. Nalunaaruteqartoqareerpat piniarsinnaanermut akuersissummik piginnittup imaluunniit akuersissutinik piginnittut akuersissut imaluunniit akuersissutit kommunalbestyrelsimut tunniutissavaat.

Imm. 4. Piffissami 15. augustimiit agguaasseqqinnissap tungaanut tikaagullinniarnissaq, tikaagulliusaarniarnissaq, arfivinniarnissaq aamma qipoqqarniarnissaq eqqarsaatigalugit,

kommunalbestyrelsit ataasiakkaat akunnerminni namminneq pisassiissutiniq sinneruttunik agguasseqqissinnaapput. Kommunini pineqartuni agguasseqqittoqassaaq najukkani aalisartut piniartullu peqatigiiffii tusarniaavigereerlugit.

Imm. 5. Nunap immikkoortortaani inuussutissarsiornermut allaffiit aqutsiveqarfinni Tasiilami aamma Ittoqqortoormiini Kommuneqarfik Sermersuumiittumi KNAPP-t suleqatigalugit akunnerminni Tunumi pisassiissutiniq agguasseqqinnissaq oqaloqatigiissutigisinnaavaat 1. augustip kinguinnguutigut.

Imm. 6. Imm. 3 aamma 4 naapertorlugit agguasseqqinneq pillugu aalajangiussat allaganngorlugit Piniarnermut Naalackersuisoqarfimmut nalunaarutigineqassapput agguasseqqittoqannginnerani kingusinnerpaamik sapaatip akunneranik sioqqullugu. Taamatuttaaq pisassiissutit sinnerinik agguasseqqinnermi angusat Piniarnermut Naalackersuisoqarfimmut nalunaarutigineqassapput.

Imm. 7. Piniarnermut Naalackersuisup KNAPK aamma KANUKOKA siumungaaq tusarniaavigereerlugit www.naalackersuisut.gl aqutigalugu aamma tusagassiorfinnut nalunaaruteqarnikkut tamanut saqqummiussilluni nalunaarutigisinnaavaa, akuersissutit tunniunneqarsimasut kommunimut allamut imaluunniit kommunip iluani nuunneqarsimasut imaluunniit atorunnaarsimasut nalunaaruteqarnerup saqqummiunneqarnerani piffissamiit atuutilersumik. Tamatuma kingorna akuersissutit utertinneqassapput imm. 3 naapertorlugu.

Kapitali 5

Arfernik piniarneq

Tikaagulliit

§ 9. Piniarnermut Naalackersuisup ukiut tamaasa KNAPK aamma KANUKOKA tusarniaavigereerlugit nalunaarutigissavaa, tikaagulliit amerlanerpaamik qassit qaammatisiutit ukiuanni Kalaallit Nunaata Kitaani aamma Tunumi pisarineqarsinnaanersut.

§ 10. Tikaagulliit taamaallaat piffissami 1. marts - 30. novembarimut pisarineqarsinnaapput, ullut taaneqartut marluk ilanngullugit.

Imm. 2. Tikaagulliit piaqqisartillugit arnavissat piaraalluunniit pisarineqaqqusaanngillat.

Imm. 3. Taamaallaat inuit arfanniarsinnaanermut akuersissutillit akuersisaasunillu atortullit tikaagullissinnaapput, takukkit §§ 4, 11 aamma 22. Atortut Piniarnermut Naalackersuisoqarfimmit taamaasiornissamut ingerlatseqatigiiffimmit akuersisaasumit akuersissutigineqarsimassapput.

Tikaagullinniarnermi atortut

§ 11. Angallatit qaartartortalimmik tuukkartalimmik qamutilillit, tikaagullinniarnermut peqataasut, sutigut tamatigut 9,2 aamma 22,0 meterit akornanni angissuseqassapput ningittakkanut qalorsuarnulluunniit amooruteqassallutik minnerpaamik 2 tonsinik amoorisinnaassusilinnik imaluunniit angallatit qaqitsissuteqassapput.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Tikaagullinniarnermut taamaallaat atorneqarsinnaapput qamutiliit qaartartortalimmik tuukkartallit 50 mm-inik kaliberillit tikaagullinniarnermi qaartartortalinnik tuukkallit §§ 22 aamma 23 naapertorlugit. Qaartartortalinnik tuukkartat arfanniutit Piniarnermut Naalackersuisumit akuerineqarsimasuussapput.

Imm. 4. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppernarsaatillit qaartartunik taaneqartunik pisisinnaapput atuisinnaallutillu.

Imm. 5. Qaartartortalinnik tuukkartanik arfanniutinik taamaallaat tunisisoqarsinnaavoq imm. 4 naapertorlugu atuuttumik uppernarsaammik ukiumut pineqartumut piniarsinnaanermut akuersissummik atuuttumik takutitsisoqarneratigut.

Imm. 6. Tikaagullik pissanneqartoq, toqunneqanngitsorli sapinngisamik piaarnerpaamik toqunneqassaaq. Niaquagut aallaallugu toqunneqassaaq, qaartartortalimmik tuukkamik arfanniummik imaluunniit qoorortuumik minnerpaamik 7,62x65 mm (.30-06)-imik sulloqqortussusilimmik.

Imm. 7. Piniarsinnaanermut akuersissutalik piffissaalluarallartillugu piniarnissamut pilersaarut aamma ulloq piniarfiusussaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

Ataatsimoorluni tikaagullinniarneq

§ 12. Piniarnermut Naalackersuisoq akuersisinnaavoq ataatsimoorluni piniarnermi qamutilimmik tuukkartalimmik sakkoqanngikkaluarluni amerlanngitsunik tikaagullittoqarsinnaaneranut. Taamatut akuerinnittoqarsinnaavoq piniarneq nunaqqatigiinnut annertuumik pingaaruteqarpat aamma nunaqqatigiit angallatinit tuukkartalinnik qamutililinnit neqinik nutaanik naammattumik pilersorneqarsinnaanngippata.

Imm. 2. Piniarnermut Naalackersuisup ataatsimoorluni tikaagullinniarnissamut akuersissutigineqartut aqutsiveqarfinnut agguaatissavai KNAPK aamma KANUKOKA tusarniaavigereerlugit, nunamut tamarmut pisassat tamarmiusut agguaanerannut peqatigitillugu.

Imm. 3. Kommuniip ataatsip aqutsiveqarfiullu ataatsip iluani ataatsimut piniaqatigiilluni piniarsinnaanermut akuersissutit agguanneqarneranni nunaqarfiit tamatumalu tulliani illoqarfiit qaartartortalimmik tuukkartalimmik qamutililinnik angallateqanngitsut sallerpaatinneqassapput.

Imm. 4. Taamaallaat umiatsianik piginnittut ataatsimoorluni piniarnissamut akuersissummik tunineqarsinnaapput.

Imm. 5. Akuersissuteqarnissami piumasaqaatigineqarpoq:

- 1) piniarneq aqqissuunneqassasoq ataatsimoorluni piniarnertut ikinnerpaamik umiatsiaaqqat tallimat piniarnerni ataasiakkaani peqataatillugit,
- 2) angallatit qaartartortalimmik tuukkartalimmik qamutileqanngitsut sutigut tamatigut 9,2 meterit angullugit angissusillit ataatsimoorluni piniarnermi peqataasinnaapput, kisiannili angallatit siuttuutinneqassanatik.
- 3) piniarneq qoorortuut minnerpaamik 7,62x63 mm-imik (.30-06) sulloqqortussusillit atorlugit

ingerlanneqassaaq,

4) umiatsiaaqqat tamarmik unaaqassapput alertalinnik avataasaqassallutillu pisap kivisinnginnissaanut naammattunik.

5) angallatit ataatsimoorluni piniarnermut peqataasut taamatuttaaq ningittakkanut qalorsuarnulluunniit amoortaateqassapput minnerpaamik 2 tonsinik kivitsisinnaasunik, kraftblokimilluunniit atortuligaassallutik.

6) piniarneq ingerlanneqassasoq naalakkamit, agguaanermut atatillugu najukkami aalisartut piniartullu peqatigiiffiannit kommunimillu umiatsiaaqqanik piginnittut akornannit toqqarneqartumit piniarsinnaanermut akuersissummillu piginneqataasunit tamanit siumut ilisimaneqartumit aqunneqarluni,

7) piniarneq aallartinneqassanngilaq ataatsimoorluni piniarnermut peqataasussat piniarsinnaanermik akuersissummillu piginneqataasut tamarmik piniarnerup aallartinnaasunik kalerrinneqareertinnagit.

8) tikaagullik sapinngisamik pilertornerpaamik toqusarneqassaaq aamma

9) piniarsinnaanermut akuersissummik pisaqarnermi peqataasut pisap agguarneqarnerani ilaatinneqassapput.

Imm. 6. Piniarsinnaanermut akuersissutillip piffissaalluarallartillugu piniarnissamut pilersaarut aamma ulloq piniarfiusussaq pillugit sumiiffimmi piniarnermut aalisarnermullu nakkutilliisumut siumoortumik nalunaarutigissavai.

Tikaagulliusaat

§ 13. Ukiut tamaasa Piniarnermut Naalackersuisup KNAPK aamma KANUKOKA tusarniareerlugit nalunaarutigisassavaa qaammatisiutit ukiuat malillugu ukiumi tassani Kalaallit Nunataa Kitaani tikaagulliusaat qassit pisarineqarsinnaanersut.

§ 14. Tikaagulliusaat 15,2 meterinit takinerusut kisimik piffissami 1. januaarimiit 31. decembarimut ullut marluk pineqartut ilanngullugit pisarineqarsinnaapput.

Imm. 2. Tikaagulliusaat piaqqisartillugit arnavissat piaqqalluunniit pisarineqaqqusaanngillat.

Imm. 3. Taamaallaat inuit tikaagulliusaarniarnissamut akuersissutillit akuerineqarsimasunillu atortullit tikaagulliusaarsinnaapput §§ 4, 15 aamma 22 naapertorlugit. Atortut ingerlatseqatigiiffimmit Piniarnermut Naalackersuisumit taamaasiornissamut akuerineqarsimasumit akuersissutigineqarsimassapput.

Tikaagulliusaarniarnermi atortut

§ 15. Angallatit tikaagulliusaarniarnissamut akuerisat makkuupput:

1) angallat ataaseq minnerpaamik 11,0 meter t.t.-imik takissusilik.

2) Tikaagulliusaamut ataatsimut ikinnerpaamik angallatit marluk tamarmik minnerpaamik 9,2 meterinik (t.t.) takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qaartartortalinnik tuukkartalinnik qamutileqassapput aamma ningittakkanut qalorsuarnulluunniit amoorutininik minnerpaamik tonsinik tallimanik qaqitsisinnaassusilinnik amooruteqassapput imaluunniit kraftblokunik atortulissallutik. Angallatit tamarmik aleqassapput sioqutalimmik avataqassallutillu pisarineqartup kivinnginnissaanut naammattunik.

Imm. 4. Tikaagulliusaarniarnermi taamaallaat atorineqarsinnaapput qamutillit tuukkartallit minnerpaamik 50 mm-inik sulloqqortussillit tuukkallu nuuatigut tikaagulliusaamut atortakkamik qaartartortallit, takukkit §§ 22 aamma 23. Tuukkat qaartartortallit arfanniutit Piniarnermut Naalackersuisumit akuersissutigineqarsimassapput.

Imm. 5. Tikaagulliusaarniarnerit tamaasa qaartartup tuukkap arfanniutip saniatigut allamik unaamik qaartartortalimmik tuukkartalimmik arfanniummik piareersimasoqassaaq.

Imm. 6. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppernarsaatillit taamaattunik pisisinnaapput atuisinnaallutillu.

Imm. 7. Qaartartunik tuukkartalinnik arfanniutininik taamaallaat tunisisoqarsinnaavoq imm. 6 naapertorlugu atuuttumik uppernarsaammik kiisalu ukiumut pineqartumut akuersissummik atuuttumik takutitsisoqarneratigut.

Imm. 8. Tikaagulliusaaq pissanneqartoq, toqunneqanngitsorli sapinngisamik piaartumik toqunneqassaaq. Toqutsisoqassaaq niaquatigut qaartartumik tuukkamik tikaagulliusaarniummik aallaallugu.

Imm. 9. Akuersissummik pigisalik piffissaalluarallartillugu piniarnissamut pilersaarut aamma ulloq piniarfiusussaq pillugu sumiiffimmi piniarnermut aalisarnermullu nakkutilliisumut siumoortumik nalunaaruteqassaaq.

Arfiviit

§ 16. Ukiut tamaasa Piniarnermut Naalackersuisup KNAPK aamma KANUKOKA tusarniareerlugit nalunaarutigisassavai qaammatisiutit ukiuat malillugu ukiumi tassani Kalaallit Nunataa Kitaani arfiviit qassit pisarineqarsinnaanersut.

§ 17. Taamaallaat arfiviit inersimasut pisarineqarsinnaapput piffissami apriliip 1-ianiit decembarip 31-anut ullut pineqartut marluk ilanngullugit.

Imm. 2. Arfiviit piaqqisarpata arnaat piaraalluunniit pisarineqaqqusaanngillat.

Imm. 3. Taamaallaat inuit arfanniarnermut licensillit akuerisaasunillu atortoqartut arfivinniarsinnaapput, takukkit §§ 4, 18 aamma 22. Atortut Piniarnermut Naalackersuisoqarfimmit taamaasiornissamut ingerlatseqatigiiffimmit akuerisaasumit akuerineqarsimasuussapput.

Arfivinniarnermi atortut

§ 18. Angallatit arfivinniarnissamut akuerisat ukuupput: Arfivimmuut ataatsimut angallatit ikinnerpaamik pingasut tamarmik takissuseq tamakkerlugu (t.t.) minnerpaamik 11,0 meterinik takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qamutilimmik qaartartortalinnik tuukkartalinnik aamma ningittakkanut qalorsuarnullunniit amoorutininik minnerpaamik tonsinik tallimanik qaqtsisinnaasunillinnik amooruteqassapput imaluunniit kraftblokunik atortuligaassallutik. Angallatit tamarmik aleqassapput sioqarlutik aamma avataqassallutik pisarineqartup kivinniginnaasanut naammattunik.

Imm. 4. Arfivinniarnermi taamaallaat atornerqarsinnaapput qamutillit tuukkartallit minnerpaamik 50 mm-inik sulloqqortussusillit tuukkallu nuuatigut ikkuttakkanik tikaagulliusaamut atortakkamik qaartartortallit, takukkiit §§ 22 aamma 23. Qaartartut Piniarnermut Naalackersuisumiit akuerineqarsimasussaapput.

Imm. 5. Arfivinniarnernit tamaasa angallatit arfivinniarnermi ilaasut tuukkamik qaartartortalimmik allamik arfanniummik piareersimatitsisoqassaaq.

Imm. 6. Taamaallaat inuit qaartartortalimmik tuukkamik arfanniummik atuinissamut pikkorissartitsinernut peqataasimanerminnut atuuttumik uppernarsaatillit qaartartunik taaneqartunik pisisinnaapput passussisinnaapput.

Imm. 7. Qaartartunik tuukkartalinnik arfanniutininik taamaallaat tunisisoqarsinnaavoq imm. 6 naapertorlugu atuuttumik uppernarsaammik kiisalu ukiumut pineqartumut licensimik atuuttumik takutitsisoqarneratigut.

Imm. 8. Arfivik pissanneqartoq, toqunneqanngitsorli sapinngisamik piaartumik toqunneqassaaq. Toqutsineq pissaaq sakiaatigut tuukkaq qaartartortalik arfivinniut atorlugu.

Imm. 9. Licensimik pigisaqartoq piffissaalluarallartillugu piniarnissamut pilersaarut aamma ulloq piniarfiususaaq pillugu piniarnermut aalisarnermullu nakkutilliisumut sumiiffimmi qaninnermut siumoortumik nalunaaruteqassaaq.

Qipoqqaat

§ 19. Piniarnermut Naalackersuisoq, KNAPK aamma KANUKOKA tusarniaaffigereerlugit ukiut tamaasa nalunaarutigisarpai Kitaani qipoqqaat amerlanerpaamik qassit ukioq taanna pisarineqarsinnaanersut.

§ 20. Taamaallaat qipoqqaat inersimasut pisarineqarsinnaapput piffissami januaarip 1-ianiit decembarip 31-anut ullut pineqartut marluk ilanngullugit.

Imm. 2. Qipoqqaat piaqqisartillugit arnaat piaraalluunniit pisarineqaqqusaanngillat.

Imm. 3. Taamaallaat inuit arfanniarnissamut licensiuteqartut qipoqqarnisarnissamullu atortunik akuerisanik peqartut qipoqqarniarsinnaapput, takukkiit §§ 4, 21 aamma 22. Atortut ingerlatsivinnit Piniarnermut Naalackersuisumit taamaaliornissamut pisinnaatissimasaanit akuerineqarsimasussaapput.

Qipoqqarniarnermi atortut

§ 21. Angallatit qipoqqarniarsinnaanermut akuerineqartut ukuupput:

1) Angallat ataaseq takissusaa minnerpaamik 11,0 meterimik (t.t.) takissusilik.

2) Qipoqqarmut ataatsimut angallatit ikinnerpaamik marluk takissusaat minnerpaamik 9,2 meterimik (t.t.) takissusillit.

Imm. 2. Angallatit imm. 1-imi taaneqartut Umiartornermik Aqutsisoqarfimmi GR-normulerlugit, radiukkut kalerrisaarinermi ilisarnaaserlugit nalunaarsorneqarsimassapput kiisalu angallatip piginnittua nalunaarsugaasimassalluni.

Imm. 3. Angallatit imm. 1-imi taaneqartut qamutilimmik tuukkartalinnik aamma ningittakkanut qalorsuarnut amoorutinik minnerpaamik tonsinik tallimanik qaqitsisinnaassusilinnik amoortaateqassapput imaluunniit kraftblokumik atortulersugaassallutik. Angallatit tamarmik aleqassapput sioqutalimmik avataqassallutillu pisarineqartup kivinnginnissaanut naammattunik.

Imm. 4. Qipoqqarniarnermi taamaallaat atorneqarsinnaapput qamutillit qaartartortalinnik tuukkartalillit minnerpaamik 50 mm-inik sulloqqortussusillit tuukkallu nuuatigut ikkuttakkanik qipoqqarniarnermut atortakkanik qaartartortalit imaluunniit allat arfernut angisuunut akuerisat qaartartortalinnik tuukkartalit arfanniutinngorlugit allanngortitikkat, takukkit §§ 22 aamma 23. Qaartartortalinnik tuukkat arfanniutit Piniarnermut Naalackersuisumiit akuerineqarsimassusaapput.

Imm. 5. Qipoqqarniarnerit tamaasa tuukkamik qaartartortalimmik allamik piareersimatitsisoqassaaq.

Imm. 6. Taamaallaat inuit qaartartumik tuukkap nuuanut ikkuttakkamik atuinissamut pikkorissartitsinernut peqataasimanerminnut atuuttumik uppersaatillit qaartartumik pineqartumik pisisinnaallutillu passussisinnaapput.

Imm. 7. Qaartartunik tuukkap nuuanut ikkuttakkanik taamaallaat tunisisoqarsinnaavoq imm. 6 naapertorlugu atuuttumik uppersaammik, kiisalu ukiumut pineqartumut licensimik atuuttumik takutitsisoqarneratigut.

Imm. 8. Qipoqqaq pissanneqartoq, toqunneqanngitsorlu sapinngisamik piaartumik toqunneqassaaq. Toqutsineq pissaaq tuukkaq qaartartortalik atorlugu niaquata nalaatigut qipoqqarniummik qaartartulimmik tuukkartalirlugu.

Imm. 9. Licensimik pigisaqartoq piffissaq naleqquttoq sioqqullugu sumiiffimmi piniarnermut aalisarnermullu nakkutilliisumut qaninnermut siumoortumik nalunaaruteqassaaq.

Qamutillit tuukkartalit ataatsimut isigalugit

§ 22. Qamutillit tikaagullinniarnermut, tikaagulliusaarniarnermut, arfivinniarnermut qipoqqarniarnermullu atorneqartut teknikkikkut atorsinnaassutsimikkullu akornuteqassanngillat, taamaalilluni inuit ajoquseriataarnissaannut ulorianartorsiortitsissanatik. Taamatuttaaq piniarnermut atortut imatut siunertarineqartunut naleqqutsigissapput arfermik toqusaaneq sapinngisamik sukkanerpaamik pisinnaassalluni.

Imm. 2. Qamutilimmik qaartartortalimmik tuukkartalimmik angallammut ikkussineq tamatigut suliffeqarfimmit Piniarnermut Naalackersuisup taamaasiorsinnaanissamut piginnaatinneqarsimasumit akuerineqarsimassaaq.

§ 23. Qamutillit qaartartortalimmik tuukkartalit tamarmik ukioq allortarlugu ingerlatsivimmit Piniarnermut Naalackersuisumit taamaaliornissamut piginnaatinneqarsimasumit akuersissutigineqarsimassaaq.

Akuerineqareerluni toqutsisariaqarneq

§ 24. Arfernik angisuunik annertuunik ikilikkanik toqulersunik, ut tunillaassuuttumik nappaateqarunarlutik naammattoorneqarsimasunik, arfernik angisuunik aalisarnermi qassutitut aalisarnermiluunniit atortunut allanut nerngussimasunik, kiisalu arfernik angisuunik sassaasunik toqutsineq siumut Piniarnermut Naalackersuisoq toqutsisoqarsinnaavoq.

Imm. 2. Maleruaqusanik unioqquitsinani tikaagullimmik, tikaagulliusaamik, arfivimmik imaluunniit qipoqqarmik pisaqarnermi, pisaq inunnit nerissallugu piukkunnganngitsoq paasinarsissagaluarpat, pisap nappaateqarneranik imaluunniit allamik pissuteqartumik, Piniarnermut Naalackersuisoq akuersissuteqarsinnaavoq, pisaq toqutsinertut isigineqarsinnaasoq. Pisaqarnermi licensi imaluunniit akuersissut atorneqarsimappat taanna sulii atuutiinnassaaq.

Imm. 3. Imm. 1 aamma imm. 2 naapertorlugit toqunneqartariaqarsimasunik atuinissamut piumasaaqatit Piniarnermut Naalackersuisumit aalajangersarneqassapput.

Kapitali 6

Pilaffik pisallu atorluarneqarnissaat

Pilaffik

§ 25. Kommunalbestyrelsi, sumiiffimmi aalisartut piniartullu peqatigiiffiat tusarniareerlugu pilattarfinnik akuerisaasunik toqqaanissamut akisussaasuvoq.

Imm. 2. Arfanniarnermi angallammi ittuusup arfermik pisaqarfimmiit pilaffissamut ungasissuseq qaninnerpaanissaa nakkutigissavaa, asiutitsisoornissaq taamaasillunilu annaasaqarnissaq pinaveersimatinniarlugu.

Pisamik atorluaanissaq

§ 26. Kikkulluunniit arfermik angisuunik pisaqartut pisarineqartup nerineqarsinnaasortai tamaasa iluaqutigissallugit pisussaapput. Pisarineqartoq tamakkerlugu atorneqarsinnaanngippat tunineqarsinnaananiluunniit pisaqartoq pisussaavoq sinneruttut sumiiffimmi najugaqartunut tunniutissallugit.

Imm. 2. Arfernik pilanneq kiisalu arferup perluuinik eqqaaneq inuussutissalerinermi nakkutilliinermik inatsisit aamma avatangiisit illersorneqarnissaannik inatsisit naapertorlugit ingerlanneqartassaaq. Arferup saanikuinik pinngortitami asiutinneqarnissai siunertaralugit inissiigallarnissaq pissaaq Piniarnermut Naalackersuisoq aamma kommunini oqartussaasut sukumiinerusumik isumaqatigiissuteqarfigereerlugit.

Kapitali 7

Pisanik nalunaarsuineq, tunitsivinnut tunisineq aamma tuniniaaneq

Nalunaarsuineq

§ 27. Tikaagullit, tikaagulliusaat, arfiviit qipoqqaalluunniit pсарineqartut tuniniarneqalissanngillat kommunip allaffia taassumaluunniit immikkoortorta qarfia pсарineqartunik nalunaarsueqqaarsimatinnagu. Nalunaarsuisoqartassaaq akuersissummi allagartamiluunniit naqissusiinikkut.

Imm. 2. Akuersissummik imaluunniit qamutilimmik tuukkartalimmik qaartartortalimmik piniarnissamut akuersissummik piginnittoq naqitsimmik naqissusiisoqartinnagu pisussaavoq tuukkamik qaartartortalimmik arfanniummik pisiامي allagartaa kommunip allaffianut takutissallugu kiisalu qaartartut atoriikkani takutissallugit normuisa misissorneqarnissaat siunertaralugu.

Imm. 3. Pisamik taassumaluunniit ilaanik tuniniaasoqaranilu pisisoqassanngilaq, akuersissummik allagartamilluunniit piginnittup akuersissutip allagartalluunniit nuutinneratigut uppersaareersimatinnagu, tuniniaaniarluni pisumi qinnuigineqarnikkut takutinneqartussamik. Nuutinneratigut takuneqarsinnaassaaq, pсарineqartoq kommunimi oqartussaasumit nalunaarsorneqarsimasoq.

Imm. 3. Taamaattoq kommunip allaffiata ammanerisa avataatigut tuniniaaneq aallartinneqarsinnaavoq allaffiup ammannerata kingornatigut piaartumik nalunaarsuisoqareerpat.

Tunisineq

§ 28. Arferit angisuut nerineqarsinnaasortaanik angallatit tunitsivittut atorneqassanngillat. Imm. 2. Tunitsivinnut akuerisaasunut pсарineqartunik tunisineq taamaallaat inuussutissarsiutigalugu piniartunit, piniarnermut allagartamik atuuttumik aamma akuersissummik allagartalimmilluunniit naqissuserneqarsimasumik takutitsisinnaasumik pisinnaavoq § 27, imm. 1 aamma 3 naapertorlugu.

Imm. 3. Naalackersuisut kommuninut pisassiissutini pisassiissutinik tunissanik aalajangersaasinaapput, kommunini piniarsinnaanermut pisassiissutinik tunineqarsimasuni.

Imm. 4. Tunineqarsinnaasutut pisassiissutinik aalajangersaasoqarsimappat, tunitsiviit ullut tamaasa tunineqarsimasut annertussusii pillugit piffissami tunisinerup akuersissutigineqarfigisaani Piniarnermut Naalackersuisoqarfimmut paasissutissiisassapput.

Imm. 5. Piniarnermut Naalackersuisoq tamanut saqqummiussa qararluni nalunaaruteqartassaaq **www.naalackersuisut.gl atorlugu** tunisineq qaqugu taamaatinneqassanersoq kommunimi sumiiffimmilluunniit aqutsiviusumi pineqartumi.

Tuniniaaneq

§ 29. Atuisussavimmut, taakkununga ilanngullugit igaffissuaqarfinnut, neriniartarfinnut, sullissiveqarfinnut assigisaannulluunniit, kiisalu najukkani kalaalimineerniarfinniit tuniniaanerit aamma inuinnarnut tunisaqartarnerit taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik pigisaqartumit ingerlanneqarsinnaavoq aamma akuersissummi allagartamilluunniit § 27 imm. 1 aamma 3 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppernarsaatinik takutitsisinnaasunik.

Imm. 2. Suliffeqarfinnut toqqaannartumik tuniniaaneq taamaallaat inuussutissarsiutigalugu piniartunit inuussutissarsiutigalugu piniarnermut allagartamik atuuttumik peqartumit ingerlanneqarsinnaavoq aamma akuersissummik allagartamilluunniit § 27 imm. 1 aamma 3 naapertorlugit naqissuserneqarsimasunik takutitsisinnaasumit, imaluunniit taamaasiorsinnaanissamut inunnit piginnaatinneqarsimasunik qinnuigineqarnerminni uppernarsaatinik takutitsisinnaasunik.

Imm. 3. Igaffissuaqarfiit, neriniartarfiit, sullissiveqarfiit assigisaallu imm. 1-imi taaneqartut, kiisalu suliffeqarfiit imm. 2-mi taaneqartut uppernarsarsinnaassavaat neqit, orsut, qipoqqat mattaallu arfernit angisuuneersut inuussutissarsiutigalugu piniartunit inuussutissarsiutigalugu piniarnermut atuuttumik naqissuserneqarsimasunik allagartalinnit akuersissutilinniilluunniit pisisimanertik uppernarsarsinnaassavaat, § 27, imm. 1 aamma 3 naapertorlugit.

Imm. 4. Imm. 1-imiit 3-mut naapertorlugit uppernarsaat, atsiorneqarsimasoq akiliisimanermut uppernarsaataasoq inuussutissarsiutigalugu piniarnermut allagartamik atuuttumik nuutinneqarsimasumik naqissuserneqarsimasumik akuersissutitalik allagartartalilluunniit.

§ 30. Inuussutissarsiutigalugu piniarnermut allagartaq atuuttoq, akuersissut, allagartaq tunisinissamut akuerineqarsimaneq qaqugukkulluunniit politiinit, piniarnermut aalisarnermullu nakkutilliisunit aamma inunnit taamaasiorsinnaanissamut piginnaatinneqarsimasunit qinnuigineqarnermi takutinneqarsinnaassaaq.

Kapitali 8

Umassusilerinikkut misissugassat assilisallu

§ 31. Kinaluunniit arfermik angisuumik pisaqarsimasoq pisussaavoq neqiminermik mattattalimmik kommunip allaffianut pilanneqarnerata kinguninnguatigut piaarnerpaamik misissugassamik tunniussinissamut, suuneranik, ullormik sumilu pisarineqarsimanageranik paasissutissartalerlugu. Neqinik misissugassat poorineqartussamut plastikiusumut Pinngortitaleriffimmit tunniunneqarsimasumut aanaveersaammik imerpalasortalimmut ikineqartassapput.

Imm. 2. Kommunip allaffiata misissugassat paasissutissallu tiguneqareernerisa kinguninnguatigut Pinngortitaleriffik, Box 570, 3900 Nuummumt nassiutissavai.

Kapitali 9

Arfernik takornariartitsisarneq

§ 32. Kommuni ileqqoreqqusaliorsinnaavoq arfanniernerup aamma arfernik takornariartitsisarnerup ingerlanneqartarneranut sukumiinerusumik maleruagassartalinnik.

Kapitali 10

Kommunit ileqqoreqqusaat

§ 33. Kommunalbestyrelsi nunaqarfinni siulersuisunik aamma najukkani aalisartut piniartullu peqatigiiffiannik tusarniaareerluni kommunimi ileqqoreqqusakkoortumik piumasaqaatinik aalajangersaasinnaavoq § 4, § 5, § 8, imm. 3 aamma 4, § 12, §§ 25-27 kiisalu § 32-imi aalajangersarneqarsimasunit sukannernerusunik.

Imm. 2.

Kommunimi ileqqoreqqusat Piniarnermut Naalackersuisumit atuutilersinneqassapput.

Kapitali 11

Immikkut akuersissuteqarneq

§ 34. Ilisimatusarneq anguniagarineqarpat Piniarnermut Naalackersuisoq nalunaarutip matuma aalajangersagartaanit immikkut ittumik akuersissuteqarsinnaavoq.

Kapitali 12

Nalunaaqutsersuineq, annissuineq aamma pineqaatissiissutit

§ 35. Arfernik angisuunik uumatillugit misissugassanik tigusinerit, nalunaaqutsersuinerit kiisalu sulinerit allat misilittaanertallit taamaallaat Pinngortitaleriffimmit suliarineqartarsinnaapput. Inuit allat Piniarnermut Naalackersuisumut akuersissummik pissarsiniassapput.

§ 36. Uumasut nujuartat nungutaanissaminnik navianartorsiortinneqartut naasullu nunani tamalaani nioqqutigineqartarnerat pillugu isumaqatigiissut 3. marts 1973-imeersoq (Washingtonkonventionen/CITES) naapertorlugu arferit angisuut neqaannik, mattaannik il.il. iluanaarniutigalugu annissuinissaq eqqussuinissarlu inerteqqutaapput. Akuerisaavorli arferit angisuut §

34 naapertorlugu pisanineqarsimasut ilaannik annissuisinnaaneq.

§ 37. Pisanik arsaarinnittoqarsinnaavoq aamma akiliisitsoqarsinnaavoq:

1) Nalunaarummi ukunani §§ 2, 10, 11, 14, 15, 17, 18, 20, aamma 21, § 22, imm. 2, §§ 23, 26-31, 35, aamma 36, unioqutitsisoqartillugu.

2) Akuersissummik utertissimanngikkaanni tamanna pillugu peqqussut naapertorlugu § 7, imm. 2 aamma 4, aamma § 8, imm. 3 aamma 7, aamma

3) Ataatsimoorluni piniarnermut akuersissummik atuineq § 12 naapertorlugu aamma § 12, imm. 5.-imi piumasqaataasunik naammassinnissimanngikkaanni.

Imm. 2. Ingerlatseqatigiiffiit ilaallu ilanngullugit (inatsisitigut piginnaatitaasut pisussaataasullu) akiliisinneqarsinnaapput aamma pingitsaaliinikkut arsaarinnissuteqarfigineqarsinnaapput nalunaarummi matumani atuuttumi aamma Kalaallit Nunaanni pinerluttulerinermi inatsisimi kapitali 5 naapertorlugu malittarisassanik unioqutitsisimagunik.

Imm. 3. Kalaallit Nunaanni pinerluttulerinermi inatsimmi malittarisassat malillugit nalunaarut naapertorlugu kommunimi ileqqoreqqusaliat atuuttut naapertorlugit pineqaatissiilluni akiliisitsisoqarsinnaavoq aamma arsaarinnissuteqartoqarsinnaavoq.

Kapitali 13

Atuutilersitsineq

§ 38. Nalunaarut atuutilissaaq 1. januar 2015 aallarnerfigalugu.

Imm. 2. Arfernik angisuunik illersuineq piniarnerlu pillugit Namminersorlutik Oqartussat nalunaarutaat nr. 4, 7. februar 2013-imeersoq peqatigitillugu atorunnaarsinneqarpoq.

Imm. 3. Akuersissutinut allagartat akuersissutillu 2015-imut atuuttut nalunaarut manna naapertorlugu malittarisassaqartinneqarput.

Namminersorlutik Oqartussat, ulloq 22. december 2015

Karl-Kristian Kruse

/

Jørgen Isak Olsen